



HYDROPHOBIA seu RABIES CONTAGIOSA Affectus

est atrocissimus & deploratissimus. Hoc enim miserrimum morbi genus, (ut à Celso Medico re & nomine celso indigitatur) homines insensibiliter invadit, nonnunquam diutissimè in corpore delitescit, altas radices figens hominem miserabiliter torquet atque excruciat, usquequò tandem magnâ cum siti, maximâ tamen liquidorum omnium, averfatione, cymbam Charontis intrare cogatur.

DE NOMINATUR Rabies, quasi rapiens à rapiendo, quod rabiosi vehementiori & insolentiori veluti irâ accensi alios notos & ignotos rapiant, illisquè morsum infligentes venenum communicent, ut & ipsi rabiosi similisque naturæ evadant. Antiquis Rapia & Ravia dicta fuit. Grajis est λύσσα vel λύπια, ἀπὸ τῆς λύσις, à solutione, quod eâ detenti à recta humanitate solvantur. ὑδροφοβία ἀπὸ τῆς φόβος & ὕδατ, quod aquam abhorreant. German. Das Wüsten/Unsinnigkeit/ Wasserscheuen.

HOMONYMIA. Neque verò nostri jam instituti est agere de rabie, prout denotat indomitam & insatiabilem concupiscentiam edendi, ut apud Juvenal.

rabidum facturus orexin,

neque quâ pro amore & furoribus rabidis sumitur, ut apud Nemesianum Ecl. 2.

Interea tanquam nostri solamen amoris

Hoc foret, aut possit rabidos medicare furores.

neque etiam, ut ea usurpatur pro mania sive perturbatione facultatis ratiocinatricis, vel ab irâ vel aliundè pronotâ. Sed quatenus exprimit affectionem in homine, à morfu canis vel alius animalis rabidi excitatam.

DEFINITUR Morbus venenatus, à peculiari quodam veneno ab animali homini communicato, aliquando